



SIARAN AKHBAR

S.A. 2020/10/66 (HQ)

TNB SERAH LIMA VAN JENAZAH KEPADA MASJID DAN SURAU

- Hampir RM2.6 juta dibelanjakan sejak 2016 untuk baik pulih kenderaan bagi tujuan sumbangan
- Van bantu memudahkan pengurusan jenazah di kawasan terbabit

Tenaga Nasional Berhad (TNB) menyerahkan sumbangan lima van jenazah kepada masjid dan surau terpilih di Semenanjung bernilai hampir RM123,000 tahun ini bagi memenuhi tanggungjawab sosial syarikat itu kepada masyarakat.

Sumbangan itu adalah manifestasi keprihatinan syarikat utiliti tersebut untuk memudahkan urusan pengurusan jenazah masyarakat Islam di kawasan-kawasan yang memerlukan, selaras dengan amalan nilai-nilai teras syarikat.

Sejak 2016, TNB telah membelanjakan hampir RM2.6 juta untuk membaik pulih dan mengubahsuai 48 van, lori dan kenderaan pacuan empat roda (4WD) untuk disumbangkan kepada masjid dan surau, serta pertubuhan bukan kerajaan yang memerlukan.

Presiden/Ketua Pegawai Eksekutif TNB, Datuk Seri Amir Hamzah Azizan berkata, TNB tidak lekang untuk berkongsi kemakmuran dengan masyarakat sebagai tanda kesyukuran terhadap nikmat yang diperolehi.

“Melalui usaha-usaha tanggungjawab sosial yang meliputi pendidikan, pembangunan sosio-ekonomi dan kelestarian alam sekitar, TNB terus membina jambatan silaturrahim dengan masyarakat menerusi sumbangan hari ini.

“Diharapkan dengan adanya van jenazah ini, ia dapat membantu melancarkan pengurusan jenazah dan memupuk semangat kerjasama masyarakat yang menerima manfaatnya.”

Beliau berkata demikian pada majlis penyampaian van kepada lima wakil masjid dan surau di Kompleks Balai Islam An-Nur, Ibu Pejabat TNB Bangsar, semalam. Turut hadir, Ketua Pegawai Korporat TNB, Datuk Wira Roslan Ab Rahman dan Pengarah Urusan TNB Power Generation Sdn Bhd merangkap Presiden Persatuan Kebajikan Pekerja Islam TNB, Dato' Nor Azman Mufti.

Lima surau dan masjid yang menerima sumbangan van jenazah tersebut ialah Masjid Ar-Rahman di Gua Musang, Kelantan; Masjid Taman Temerloh Jaya, Temerloh, Pahang; Pertubuhan Khairat Kematian Kampung Ganda, Gerik dan Surau Nurul Iman Fasa 3, Seri Manjung, Perak; dan Surau At-Taqwa, Taman Kota Cheras, Kuala Lumpur.

Tahun ini, TNB menerima 50 permohonan untuk mendapatkan bantuan van jenazah, namun hanya lima dipilih berdasarkan keperluan masjid atau surau tersebut.

Pengerusi Masjid Taman Temerloh Jaya, Dr Abdullah Ismail mengucapkan ribuan terima kasih kepada TNB di atas sumbangan yang amat bermakna itu.

“Sumbangan ini bakal merapatkan ukhwah antara ahli kariah masjid kami dan juga kawasan berdekatan kerana usaha menjaga kebajikan mereka dapat diteruskan, terutamanya urusan mereka selepas meninggal dunia. Terima kasih TNB,” katanya.

Kesemua kenderaan yang disumbangkan adalah milik TNB yang telah dibaik pulih dan diubah suai mengikut keperluan dan ini secara tidak langsung memanjangkan hayat kegunaan van tersebut agar bermanfaat kepada masyarakat.

Dikeluarkan di Kuala Lumpur pada 11 Oktober 2020, jam 10:00 pagi
*Untuk pertanyaan lanjut media, sila hubungi Fitri Majid 013-3626923 /
Grace Tan 016-6626229 / Fazreen Eksan 019-3160401
atau emel kami: media@tnb.com.my*



Presiden dan Ketua Pegawai Eksekutif TNB, Datuk Seri Amir Hamzah Azizan (tengah) menyerahkan dokumen hak milik van kepada Pengerusi Masjid Taman Temerloh Jaya, Dr Abdullah Ismail (paling kanan) sambil disaksikan Ketua Pegawai Korporat TNB, Datuk Wira Roslan Ab Rahman (paling kiri) pada majlis penyerahan di Kompleks Balai Islam An-Nur, Ibu Pejabat Tenaga Nasional Berhad (TNB) di Bangsar.



Presiden dan Ketua Pegawai Eksekutif TNB, Datuk Seri Amir Hamzah Azizan (tengah, berjaket hitam); Pengarah Urusan TNB Power Generation Sdn Bhd merangkap Presiden Persatuan Kebajikan Pekerja Islam (PKPI) TNB, Dato' Nor Azman Mufti (tiga dari kanan, berbaju putih); Ketua Fleet Management TNB, Datuk S. Viswanathan (dua dari kiri); Ketua Global Business Solutions TNB, Mohammad Ariff Zainol (tiga dari kiri); Ketua Pegawai Korporat TNB, Datuk Wira Roslan Ab Rahman (empat dari kanan, berkemeja biru) serta kelima-lima wakil penerima sumbangan van jenazah ketika majlis penyerahan di Kompleks Balai Islam An-Nur, Ibu Pejabat Tenaga Nasional Berhad (TNB) di Bangsar hari ini.